

Quadroni succumba – probabel pervi da sbagls da ses advocat

Il tribunal federal n'entra betg sin las trais protestas

DA CLAUDIA CADRUVI / ANR

■ **Adam Quadroni batta dapi in onn per ses uffants u per in dretg da visita e da vacanzas. La dretgira regionala Engiadina Bassa/Val Müstair targlina cun decisius definitivas. Quadroni ch'è vegnì enconuscent sco whistleblower ha recurri fin a Losanna.** «Era sch'ìls giavischs dal recurrent èn zunt enlegentaivels e chapavels na po il tribunal federal betg examinar il recurs en chausa», scriva il derschader en las sentenzias publicadas l'entschatta da questa stad. La raschun: L'advocat ha fatg plirs sbagls. Uschia n'ha il derschader gnanc pudì decider schebain Quadroni duess vesair pli savens ses uffants u schebain la dretgira regionala en l'Engiadina Bassa retardescha decisius u pratitgescha forsa perfin snegaziun da dretg.

Lutga per il dretg da visita

Ils Quadronis èn sa separads avant passa in onn. La mamma ha bandunà il dachasa cun ils trais uffants. Il bab ha sinquai inoltrà ina dumonda da protecziun da lètg tar la dretgira. La procedura è sa tratga a la lunga ed è anc adina pendent. Appartegnent il dretg da visita ha la dretgira regionala decidì ch'il bab dastgia vesair ses uffants sulettain duos giadas l'emna sut surveglianza en ina canorta d'uffants. La dretgira chantunala ha dentant approvà in recurs ed ha lubì al bab da vesair ses uffants senza surveglianza.

En auters puncts areguard il dretg da visita e da vacanzas n'ha il recurrent dentant betg survegnì raschun.

Refusà ha la dretgira chantunala enpli in recurs cun la critica che la dretgira en l'Engiadina Bassa retardeschia u sneghia il dretg. Era sin la dumonda ch'ìls uffants possian passentar las vacanzas da Pastgas tar il bab n'è la dretgira betg entrada. En tut sa tracta da trais differentas decisius che la dretgira chantunala ha prendì. Encunter tuttas trais ha Quadroni recurri a Losanna.

«In virivari confus»

Ses advocat ha dentant inoltrà sulet ina acta. I saja bain pussaivel da recurrer encunter trais decisius mo cun ina acta, scriva il tribunal federal en las trais sentenzias. Ma i stoppia esser chapibel quant enavant che las singulas decisius violeschian il dretg. Gliez na saja dentant betg il cas: «L'inoltraziun cuntegna plitost in virivari confus sco era differentas pretaisas che surpassan il cuntegn da las trais decisius», stat scrit en tuttas sentenzias.

Sch'il tribunal n'entria pervi da quest'inoltraziun betg en materia sappia star avert damai ch'i dettia tuttavia anc autras raschuns. Il recurs areguard la protecziun da lètg saja vegnì inoltrà memia tard. En il recurs pervi dal retardament da dretg reclomia il recurrent – resp. ses advocat – a moda memia pauschala che l'emprima istanza prendia mo decisius superprovisorias, stauschia vi e n'actas

ed haja pers la survista. Nua che la dretgira violeschia concretain il dretg na resortia dentant betg dal scriver. Sin la protesta pervi da las vacanzas da Pastgas n'entra il derschader da Losanna betg perquai che lezzas èn gia daditg passadas cura ch'il recurs arriva a Losanna.

Era sin la dumonda per giurisdicziun gratuita, vul dir ch'il stadi surpiglia pli auts custs d'advocat, n'entra il tribunal betg. Il derschader fa attent che betg il recurrent haja da tschentar ina tala dumonda en num da ses advocat, mabain che l'advocat sez stoppia sa drizzar a la dretgira.

Sentenzias 5A_415/2018, 5A_414/2018, 5A_413/2018 dals 17 e 18 da matg 2018, publicadas ils 7 da zercladur 2018.

Dapi questa stad in nov advocat

Adam Quadroni ha dapi questa stad in nov advocat. I sa tracta da *Jean-Pierre Menge*. Sin dumonda da l'anr di l'advocat ch'el represchenta Quadroni be en la procedura pertutgant la lètg ed ils uffants, però betg en las proceduras e denunziadas penals. La dretgira regionala Engiadina Bassa/Val Müstair n'haja anc adina prendì nagina decisiu definitiva. Il november haja lieu la tractativa principala a Scuol.